

Nunatta inuiattut timersornikkut unammersuarterfissaanik qulisamik "National stadion"-imik pilersitsinissaq siunertaralugu Naalakkersuisut pilersaarummik kingusinnerpaamik UKA2016-mi saqqummiunneqartussamik suliaqaqqullugit peqquneqarnissaanik Inatsisartut aalajangiiffigisassaattut siunnersuut. Pilersitsinissamut pilersaarummi misissorneqassapput unammersuarterfissap ingerlanneqarnerani sanaartornissamilu aningaasatigut pissutsit atuuttussat (Inatsisartunut ilaasortaq Anders Olsen, Siumut)

Akissuteqaat

(Ilinniartitaanermut, Kultureqarnermut, Ilisimatusarnermut Ilageeqarnermullu Naalakkersuisunut ilaasortaq)

Siullermeerinnineq

Qulisamik "National stadion"-imik pilersitsinissamut pilersaarusiornissamik Naalakkersuisut peqquneqarnissaat pillugu Inatsisartut aalajangiiffigisassaattut siunnersuummut Naalakkersuisut aallaqqaasiullugu qujapput.

Nunatsinni timersullammannik peqarnerput timersornerullu suli ineriartornera Naalakkersuisut qularutiginnigilaat, taamaalilluni nunat tamat akornanni unamminerni amerliartuinnartunik aamma peqataatitaqartarluta.

Qulisamik "National Stadion"-imi pilersitsinissamut Naalakkersuisut pilersaarusiornissaat siunnersuutigineqarpoq, imatut paasillugu arsaattarfik nunat tamat akornanni unamminerni atorpeqarsinnaassalluni aamma atletikertoqarsinnaassalluni.

Arsaanneq timersornerlu Kalaallit Nunaanni ataatsimut isigalugu amerlasuunut ukioq tamaat ingerlanneqartartut sunngiffimmi sammisaasarput. Naalakkersuisut isumaqatigaat sungiusarfiit pitsanngorsakkat timersortartut ineriartornerannut angusaannullu pitsaasumik kinguneqassasut. Assersuummi uani "National Stadion"-i illoqarfimmi ataatsimi inissineqassaaq, ineriartornerlu innuttaasunut stadionimik ulluinnarni atuisartunut iluaqutaassaaq, kiisalu illup iluani timersuutinik maannamut ingerlanneqanngitsunik neqeroorteqartoqarsinnaassalluni.

Qulisamik arsaattarfeqarnissamik soqutiginnineq nutaajunngilaq. Innuttaasut suliniummut tassunga assingusumik namminneq piumassutsiminnik suliaqareerput. Assersuutigalugu Nuummi soqutigisaqatigiit suliniuteqarput, arsaattarfimmillu "National Arena Qulisaq"-mik isiginnaartunut 3.000-inut inissalimmik sanaartornissamut pilersaaruteqareerlutik.

Ilulissani allat ”Ilulissani ivigaasanik arsaattarfittaarniaqatigiit” arsaattarfimmik qulisamik ivigalimmik isiginnaartunut inissalimmik suliniuteqarput.

Suliniutini taakkunani marlunni pilersaarusiortoqarnikuuvoq, kisianni stadionimik sananissaq ingerlatsinissarlu pillugit imarisaatigut, ingerlatsinissamut aningaasatigullu tunngasuni siunnersuuteqartup piumasaqaataanut sanilliullugu taamatut annertutiginatik.

Ilinniartitaanermut, Kultureqarnermut, Ilisimatusarnermut Ilageeqarnermullu Naalakkersuisoqarfik aggersarneqarnerup kingorna ”National Arena Qulisaq”-mi suliniutip ineriartornera malinnaaviginiarlugu suleqatigiissitaliami peqataavoq.

Siunissami aalajangiinissamut tunngavissatut aningaasatigut missingersuusiorluni pilersaarusiortoqartariaqarnera oqaatigineqareersutut Naalakkersuisut isumaqatigaat. Siunertamut tassunga atugassatut 2015-imut aningaasanut inatsisissatut siunnersuummut allannguutissatut siunnersuummik Naalakkersuisut saqqummiissapput, tassani missingersuutit annertussusaannut allannguutaanngitsumik nuussinikkut pilersaarusiortoqarnissamut aningaasanik innersuussisoqassalluni.

Tamanna tunngavigalugu siunnersuutip akuerineqarnissaa Naalakkersuisut inassuteqaatigaat.